



皇朝詩話卷之五

清江先生文集序

周南古伊洛遺風之賢君子之稱也晉魏程子太極  
先生謝氏伯淵與又謝尊月曰先生太極圖論卷之五  
清江先生曰一余以其地以觀其山川之奇將求其  
知古人者出其間甲午歲余吟於茲得聞岐山出  
人黃子之望其出望之故求先生之書如  
其世有不谷誠也先生方世固尚然始解已  
是理其德修受其德不可考度其存乃誌於  
暇其得道也其德之於世於世於世於世

重編靖修曹月川先生文集序



周南古伊洛瀍澗地大賢君子之鄉也嘗讀程子大全  
集年譜久低徊焉又讀曹月川先生太極圖說愈不禁  
流連嘆息思一至於其地以觀其山川之奇將求猶有  
如古人者出其間甲午龜來令澗始得閱履山川過諸  
大賢君子之墟墓而弔望之故求先生之書如饑渴之  
於飲食不容緩也先生太極圖西銘述解已載其畧於  
邑乘其他書多遺失不可考戊戌春乃訪於裔孫曹繼  
顏家得通書述解又搜之於晉於秦始得夜行燭家規

輯畧語錄粹年譜共八卷梓之嗟乎孔子之沒學廢而道不明矣秦又從而燔之漢興蓋久然後出六經於灰燼散亂之中其間操觚之子虎步而驚攫者無慮數十拾家然以文字之末各相雄長而已唐有韓愈而始上接孟氏下接揚雄而折衷之其道忽明忽滅宋興諸君子出始大章以至明代是由洙泗以來至是且二千餘年由濂洛而下且五百有餘歲矣其矚然不滓純乎其純者數君之外寥寥其人且文人才士之流矜相樹幟訟言攻擊者不遺餘力使非有大疑深懼卓然不欺其志孰能始終於道而不遺哉月川先生於諸儒議論紛爭之日屹然以身任斯道之重終始大節無可疵議其立言又皆省身克己主敬明倫之旨居多是由濂洛以上溯洙泗納天下人士於義禮性命之途者則先生之書所關於世輕重爲何如耶故可斷然以先生爲足繼程子之後無疑也方付棗梨復奉大參崔公崇重理學之檄而多方搜者邑明經韓君員起之力縉紳士庶又皆趨事樂成者也是爲序

昔

順治戊戌歲陽月澠池縣知縣古燕後學張璟謹識

箋年譜

先儒有言小譜譜一身大譜譜天下萬世十五志學至七十從心夫子拍敘年譜也吾日三省謀而忠交而信傳而習曾子自敘日譜也若幼不遜長無述老不死何譜焉靖修不自爲譜而邑後學張公信民代譜之其生平好學力行成已成物自本諸身者無一不關於天下後世日積月月積歲總未嘗負此日斯可謂不負所生後之學者按是譜而見靖修之精神面目并可因是譜而上溯濂洛關閩則今日天弓張君重梓之意是可因

一端而見全體矣容城後學孫奇逢敬識

月川先生像贊



子有信質  
光言好純  
輝以古氣  
曰泐距清  
新後耶理  
東人崇明  
薛美丘心  
瑄哉有定  
顯君德篤

曹月川先生年譜一卷

韶陽張信民抱初纂著

古燕張璟天弓裁定

洪武九年丙辰春正月先生生

按家譜云其先山西平陽曲沃閭村人本姓楊氏五世祖諱嗣以父命繼舅氏後因姓曹嗣生慶徙垣曲葛伯寨慶生仲和徙永寧杜寺溝仲和生伯達伯達生敬祖始徙澠池之窟陀里敬祖先生之父也娶邵氏先舉二子至是感修竹之祥於十有三日午刻而

生先生

洪武十年丁巳先生年二歲能識數目方名  
父教以數目方名一過輒不忘翼日詢之無少差父  
以穎悟奇之

洪武十有一年戊午先生年三歲氣度端莊

先生自少特異於人與羣兒立必拱手正立不妄戲  
謔言笑處必直身端坐不妄動作指顧蓋其天性然  
也父母曰儼然老成人一般因命名曰端後字正夫  
洪武十有二年己未先生年四歲能知孝友

先生自幼知愛敬飲食必讓父母兄長然後己用出  
入或前或後必俟長者節序相慶父母呼宗族語之  
曰端吾家孝友人也

洪武十有三年庚申先生年五歲問河圖洛書

先生從父游學宮見有觀河圖洛書者問曰此星子  
黑白不同如何其人異之謂曰分陰陽也白是陽黑  
是陰顧謂其父曰童子可教歸畫圖於地問父曰與  
書上相似麼父甚奇之

洪武十有四年辛酉先生年六歲知拜祖塋



時拜掃方陳設先生詣墓前揖族人曰待行禮先生曰先作揖也是恭敬的意思族人異之

洪武十有五年壬戌先生年七歲問風雨雷電雲霓時先生侍父側見雲生問曰雲從何處起見風起問曰風從何處來雷鳴問曰雷從何處興雨下問曰雨從何處作電見問曰電從何處有光虹見問曰虹從何處有跡凡六問皆造化所以然父翼日詣學宮詢其故聞者曰異哉此子他日當有大成就

洪武十有六年癸亥先生年八歲初入里學先生問於父曰以父事師乎曰師與父當一般敬自是言動必咨稟而行

洪武十有七年甲子先生年九歲初讀忠孝經

先生讀孝經曰不如是不成人子讀忠經曰不如是不成人臣父問曰忠孝二經何如對曰聖人之言自然賢人之言勉強又問曰忠孝二道乎對曰事君以忠事親以孝似二道然孝也可事君忠也可事親實相須也父喜曰雖老師宿儒不過如此說話嘗曰人生上戴天下履地參兩間而立者不能以忠孝立身

非大丈夫也

洪武十有八年乙丑先生年十歲初讀四書

先生讀四書則知大學中庸是做人的樣子論語孟子可兼之嘗賦詩以咏其義有曰聖帝明王同一道常惺惺法是其要

洪武十有九年丙寅先生年十一歲初讀尙書

先生讀書卽洞其旨要曰治本於道道本於心爲一經之綱領嘗曰學者因傳以求經因經以求心則聖賢之學帝王之道皆可得而識矣

洪武二十年丁卯先生年十二歲初讀毛詩

嘗曰觀關雎葛覃卷耳樛木采芣諸章可以識性情之正

洪武二十有一年戊辰先生年十三歲初讀禮記

嘗曰經傳混合非聖人本意又曰學者須置身法度之中一毫不可放肆故曰禮樂不可斯須去身

洪武二十有二年己巳先生年十四歲初讀周易

後作乾坤二卦解嘗曰學者須要天理人欲之間見得分明方始有益一毫相雜則學非其學而德非其

德矣

洪武二十有三年庚午先生年十五歲初讀春秋

嘗曰褒善貶惡皆聖人微意也後作程胡二傳解

洪武二十有四年辛未先生年十六歲初讀通鑑綱目

儀禮周禮諸子等書

嘗曰六經四書天下萬世言行之繩墨也不可不使之先入其心至是又取諸書盡讀之上自三代下及近世諸儒文集無不徧觀盡識曰六經四書之外諸子百家之言不讀其書無以考覽得失而定其賢否豈增飾文墨而已雖周公孔子之聖猶且朝讀百篇韋編三絕况常人乎

洪武二十有五年壬申先生年十七歲建勤苦齋

構室以陳經籍書其戶曰勤勤勤不勤難爲人上人苦苦苦苦不苦如何通今古父命扁曰勤苦齋

洪武二十有六年癸酉先生年十八歲初入邑庠

按文集云余十八歲爲邑庠弟子員是實錄也

自稱百拙生

洪武二十有七年甲戌先生年十九歲夫人陳氏于歸

澠池陳公直見先生勤學不倦曰世有好學如是者乎以其女妻之○夫人字順夫賢而有德洪武辛酉十一月二十日生奉祖宗事舅姑能以古人爲師先生甚敬禮之蓋悅其婦道母儀皆可法云

洪武二十有八年乙亥先生年二十歲初讀辨惑系按辨惑編序余二十歲得是書如獲重璧晝夜詞習力行不怠雖寢疾出外未嘗釋手蓋喜其明正道闢邪說粹然一出於王者也

性理文集成○先生見胡仲子文集取其精要若干篇命曰性理文集曰作文必如是方善不然雖工無益嘗曰孔門游夏稱文學亦何嘗秉筆爲詞章也且如觀乎天文以察時變觀乎人文以化成天下此豈詞章之文也故呂與叔有詩曰學如元凱方成癖文似相如始類俳獨立孔門無一事只輸顏子得心齋端亦偶成曰作文不必巧載道則爲寶不載道之文臧文椀上藻言無味而意有在焉

洪武二十有九年丙子先生年二十一歲辭闕釋教先生至是志意堅定內不溺於章句文辭之習外不

惑於異端邪說之謬。卓然以斯道爲己任。有老僧素  
諳釋典。鄉人甚敬信之。時先生歸省。鄉人陰令僧詰  
先生曰。秀才勤學篤孝。但不信神佛。未善。先生曰。事  
之如何。僧曰。佛主輪迴。神主禍福。事則報本。先生曰。  
物本乎天。人本乎祖。人能敬天而不違。尊祖而繼志。  
是謂報本。若事神佛。而言行違禮。何云報本。且佛法  
自漢明帝始入中國。漢去開闢數千餘年。豈漢以前  
無輪迴。獨漢以後有輪迴哉。神如關某李水等。皆漢  
世人。豈漢以前無主禍福。獨漢以後有主禍福哉。僧  
曰。輪迴不可逃。惟佛救度之事。佛者升天堂。不事者  
墮地獄。不可不信。先生曰。人氣聚則生。氣散則死。猶  
旦晝之必然。安有死而復生爲人。生而復死爲鬼。往  
來不已爲輪迴哉。天堂無則已。有則君子登。地獄無  
則已。有則小人入。如不分君子小人。苟能事佛。一槩  
升天堂。苟不事佛。一槩入地獄。決無此理。且所謂天  
堂地獄。安在。自古及今。誰見乎。不過僧家設之以嚇  
愚民爾。使人皆事佛。不夫婦。乾坤內。不過百年無人  
類矣。佛法將安施。故曰。我道如依三界說。乾坤不過

百年空。僧無以對。久之曰。禍福不可逃。惟神能佑之。不可不事。先生曰。作善降祥。作惡降殃。禍福之來。人為感之。使人不積善。見禍而諂神求免。神本至公。豈受枉法之賊。而倒禍福之柄乎。夫積善之家。必有餘慶。積不善之家。必有餘殃。天道福善禍淫。鬼神不能移也。如不分積善積惡。苟事神者。一槩受福。不事者。一槩受禍。豈有是理。書曰。惠迪吉。從逆凶。鬼神何與。僧無以對。曰。公說神佛。皆不足事。歷代何以立教門。崇祀典乎。先生曰。佛出西方。本以化導西人。西人事之。中國可乎。故韓文公佛骨表云。人其人。火其書。廬其居。明先王之道。以道之。至於神之有功德於民者。其祀典亦不敢僭。禮天子祭天地。諸侯祭山川。大夫祭五祀。士庶人祭其祖先。上得以兼下。下不得以僭上。今一郡一邑。神祀數百。一村一落。神祀數十。家家事天地。人人祭山川。甚者昊天上帝。與五嶽及忠臣烈士。同坐一室。共饗一祀。悖禮傷教。不可勝言。魯公三望。春秋譏之。季氏旅泰山。孔子非之。况庶人乎。古者民不祀非族。神不歆非類。故狄梁公奏黜江南淫

年譜  
八  
祠千餘爲此故也。彼釋家妄說輪迴惑世誣民滅天  
理矣。拋妻子離父母滅人倫矣。雖事神佛無以救滅  
理亂倫之罪。况能報本耶。舍中國先生之法從事西  
方空寂之教。舍劬育罔極之恩。周旋釋氏悖逆之像。  
謂之忘本可也。豈能報本。如欲報本。棄而幼習。歸而  
故家拜父母於堂上。饗祖宗於地下。納室生子。思以  
繼續宗祀。上則供賦稅。下則守禮法。仰以事其父母。  
俯以畜其妻子。此所謂出幽谷而遷喬木也。報本之  
道。舍是何以哉。僧默然良久曰。秀才言是也。恨年老  
不能從學耳。咨嗟嘆息。以杖擊地者久之。

洪武三十年丁丑先生年二十二歲勸兄弟勿析居  
先生兄弟六人長竑次翊次先生次竚次靖次昱開  
有欲析居者先生作書勸之詳見夜行燭其畧云兄  
弟天合夫婦人合今有兄弟分居未聞夫婦分居者  
是疎天合而親人合也非惑與因作詩使童子誦之  
詩曰堪嘆今人這樣愚親親兄弟各分居陳襄畜犬  
猶知義何乃爲人反不如又曰舉世誰親兄弟親原  
從一氣上分身今人各自私妻子不認同胞共乳人

年譜  
洪武三十有一年戊寅先生年二十三歲勸族人勿用  
堪輿術

有欲用風水營葬者先生力誡其非以詩諷之曰葬  
家風水果何由舉世滔滔苦信求我道如依風水說  
陰陽箇箇做王侯

洪武三十有二年己卯

建文元年

先生年二十四歲勸父勿

賽神

是歲先生父從里中約當宰社先生至不進飲食勸  
止之且言賽神無益設有利害願以身當之所陳天

道人事最詳大要言行神賽從人欲也罷神賽從天  
理也聖賢千言萬語只是逼人欲明天理而已言甚  
痛切從之

洪武三十有三年庚辰

建文二年

先生年二十五歲被盜不

訟

先生二絹置書舍失之同舍愕然先生曰人失人得  
不足介意同舍曰訟之某盜某見也先生曰訟則其  
人一生復何自立二絹微物而壞人行止不可

子璉生○六月六日戌時也字如玉最賢言動縉有



父風霍蒲喪葬不用浮屠率請如玉相禮父母歿與  
第貢玉廬墓屢舉賢良方正孝行皆不就撫育季弟  
美玉友愛切至

洪武三十有四年辛巳

建文三年

先生年二十六歲攝池

### 儒學事

逮繫縣獄○時部使者照刷文卷以前官卷案不如  
式望誤下獄先生處之泰然作詩自遣有云仰天心  
無愧俯地意不慙未幾而白

洪武三十有五年壬午

建文四年

先生年二十七歲請毀淫

### 祠

時泚淫祠過多先生上書請毀之邑令楊某者從其  
言卽令先生躬詣四鄉監毀百餘所爲設里社里穀  
壇使民祈報焉惟存夏禹雷公二廟而已

永樂元年癸未先生年二十八歲說中庸庠節悅服之  
有庠師初蒞任命諸生講中庸聞先生發明親切條  
分縷析無不中理大驚異翼日延至家執其手曰公  
真秀才也用何工夫至此我輩止於記誦文辭涉獵  
科目耳未聞講論精微到此地位者○先生博學精

研嘗曰儒書不博觀無以探其本末原委之真異典  
不涉獵無以鑒其似是實非之的故能講說詳明正  
大非俗儒所及

子珮生○正月二十八日子時也字用玉性慷慨能  
幹先生以家事委之

永樂二年甲申先生年二十九歲寢疾拒用巫覡

先生疾家人禱諸鬼神巫覡以禳之又以秤稱衣名  
曰取魂先生曰禍非禳而去福非禱而至且人生陰  
魄陽魂未嘗相離譬則形影然魂氣上升魄氣下降

魂魄離則死矣豈有取魂招魄之理巫覡閒至疾所

曰秀才西王神崇之先生曰西王何神曰主生死神  
也先生曰爾本無知妄言禍福西王是夏禹平水土  
有天下後人思其功德立廟城西俗呼西王爾王在  
當時見罪人下車而泣我一書生何罪之有巫曰強  
秀才不信鬼神終當至死先生曰吾平生事親事兄  
未嘗違禮處家處鄉未嘗越分無得罪神明者孔子  
曰邱之禱久矣今者疾乃天行之數人所不免非鬼  
神有意害我也古者異行有誅異言有禁今法律亦

有師巫邪術之罪汝輩男女混雜瀆亂倫理陽奉神  
陰圖財誑世惑眾傷風敗俗罪莫大焉巫覡懼服後  
先生疾瘥父兄欲以牲祭天先生扶杖起跪曰敬鬼  
神而遠之可也何必褻瀆爲惑於邪說溺於流俗聖  
賢之罪人也固止之

永樂三年乙酉先生年三十歲應鄉試不第

先生未第人歸罪造物先生曰學問未充造物何關  
益勤苦無厭時直指使按臨詢諸生賢否皆推重先  
生勤學篤孝嘗作永思堂記直指使覽而異之曰士  
者劉蕡下第同類恥之此人庶幾焉諭其父兄蠲徭  
役

永樂四年丙戌先生年三十一歲家規輯畧成

先生取義門鄭氏家規九十餘條自撰六十餘條編  
爲十有四篇命曰家規輯畧白其父令子弟誦習而  
守之序畧云國有國法家有家法人事之常也治國  
無法則不能治其國治家無法則不能治其家譬則  
爲方圓者不可以無規矩爲平直者不可以無準繩  
是故善治國家者必先立法以垂其後自今觀之江

南第一家義門鄭氏合千餘口而一家歷千餘歲而  
一日以其賢祖宗立法之嚴賢子孫守法之謹而致  
然也

勸彭鄒二先生勿赴水陸會○按拙巢鳴先生上二  
先生書云竊見僧不爲道醮而廢齋道不爲僧齋而  
廢醮是彼各知自重也爲儒家者祖天地宗帝王師  
周孔將以正人心扶世道反爲齋醮而廢禮是自輕  
耳寧無愧乎且吾儒家之禮原出於天地制成於帝  
王自周公而上作之者非一人自周公而下明之者  
亦非一人矣具載五經四書詳且備焉彼釋迦老聃  
之書本無齋醮之論而梁武宋徽之君妄爲齋醮之  
說故武餓死臺城而徽流落金虜本欲求福反爲得  
禍柰何世不知戒踵繆成俗言至於此甚可痛也故  
朱子曰這些邪見壞世間多少好人破却世間多少  
好事誠如是言伏惟先生爲斯文之宗主其於繼往  
聖開來學正人心息邪說存之素矣茲有僧佯修善  
事擅聚邑人男女混雜晝夜留連甚非禮也端愧無  
道以正羣心而竊有望於先生也輒忘固陋僭申狂

愚冀先生聽之距其事俾邑人好怪者不得借爲口實以蠱人心則斯文幸甚風俗幸甚二公從之

永樂五年丁亥先生年三十二歲初建家祠成

初曹氏祖父從流俗事淫祠先生白父請建祠堂依文公家禮以奉先世神主置祭田二十畝祭帛取諸蠶桑爲籍印識使子孫奉行焉

男女訓誡辭成○

見家規輯畧

赴垣曲省祖墓○高祖慶曾祖仲和邱壟在焉

子琰生○八月九日午時也字廷玉天性淳篤無僞

永樂六年戊子先生年三十三歲春三月夜行燭成

先生此書蓋取夜行以燭之義以告其父者書凡十有五篇首陳善惡禍福之由繼以保身正家之要其開明禮却俗闡道闢邪訓子孫友兄弟睦宗族和隣里嘉言善行無所不備其所以閉先聖之道破愚俗之見正人心以息邪說者誠大有所關也書成命曰夜行燭父嘉納而力行之

秋八月舉於鄉○翰林博士馬巨江訓導李君恭所取也名在第二爲詩經魁

有司表其里曰端士里。○其里本名窟陀有司察先生言行端正見道不惑復以文學魁鄉故易之有司吳公名友信湖廣人

永樂七年己丑先生年三十四歲春二月會試南宮登乙榜第一夏四月授山西霍州儒學學正

同列以先生才高與教鐸恐不樂先生曰不然某於道未有所得今得是除喜其溫故尙可知新庶幾深造於道書曰惟敦學半念終始典於學是言敦與學各有得也

與白雲先生同升講席○霍人李德字紹賢白雲其號也先庠師乏員請爲賓師聞先生除謂諸生曰聞新博士年少才高我當早退卽日辭去先生至命諸生請同升講席相與答問論辨久而愈敬白雲語諸生曰學不厭教不倦不遷怒不貳過不挾長不挾貴曹先生之盛德也其知古今之宜達事變之節尊所聞行所知區區莫能及之倡明道學繼往開來必先生也古人云經師易得人師難逢今得人師矣可不自勉由是諸生竦動四方聞風來學者雲擁川至文

年譜  
風大振晉陽閒矣

永樂八年庚寅先生年三十五歲霍州饑輒分俸濟諸生之貧者又勸守發倉賑貧民郡中多賴之

資助滇南官之任○時有官任滇南途次霍凍餒不能行先生惻然解衣衣之備給其餼糧路費諸生感化多有資助之者

代養邢清母○貢生邢清赴太學憂母老闕養言輒泣下先生曰汝第往勿慮吾爲若養之先生夫人尤加厚待三年歸省母子感激不已邢官歷縣尹未嘗一日不念先生之德

### 赴曲沃省祖墓

子璟生○二月二十四日酉時也字良玉性穎悟強記過人善屬文能詩熟於舉業以繼述自期父母歿與兄如玉廬墓後官涇源縣尹

永樂九年辛卯先生年三十六歲迎親就養

治同僚喪○司訓張睿遂平人以疾終母老子幼先生爲主其喪備棺槨卜葬地一依文公家禮後歸葬復資給周備遣人護送祀墓而還

霍州門人秦昭登鄉試第一。○霍庠高第也。於先生講論始疑之。終悅之。四書詳說由所請而成。是歲自稱古愚子。

永樂十年壬辰先生年三十七歲建義祠成。

先生父幼孤出贅邵氏。資教養焉。邵氏無後。故別立義祠祀之。亦義起也。○初邵氏與曹氏合祀一祠。其位次曹居右。邵居左。承父志也。今別建祠分祀。以正經制焉。

汾西范琮來學。○琮父約大僕丞。聞先生倡明道學。遣子從學。後登永樂乙未進士官庶吉士。

樵者從化。○時霍州有樵者。鬻薪獲米。誤得金釵。明日還其主。或曰辛苦得釵。何輕也。樵者曰。曹郡博有道人也。以有道者。倡教吾霍。可不知化乎。先生聞之。曰。十室之邑。必有忠信。訪其姓名。入郡志。

永樂十有一年癸巳先生年三十八歲建養素堂。

西蜀張澍張浩來學。○資縣人。父鑑禮部員外郎。聞先生倡道於霍。遣二子來學。澍早卒。浩登宣德庚戌乙科。



客死於道者。捐財葬之。○先生閒出霍城西。有中暑而死者。不知何許人。居汾西鬻薪於霍。其妻抱子哭其旁。先生問焉。對曰。夫婦遠離鄉土。以賣柴爲生。今死於道。夫何能葬。妾何能歸乎。欲鬻其子。先生固止。令取蓆藁葬之。又以布二疋給其婦。婦謝曰。非逢仁人。吾母子相繼而死。

永樂十有二年甲午。先生年三十九歲。二親歸澠池。保定王綱來學。○祁州人父坦。官給事中。聞先生風。遣子就學。後中乙科。

參政張公以廉靜贈之。○張公臨霍。察先生學行卓異。執其手曰。今日乃知曹正夫也。大書廉靜二字贈之。當時稱廉靜先生者。本此。

霍州門人郭晟等中鄉舉六人。

永樂十有三年乙未。先生年四十歲。汾西杭鎮來學。○鎮字仲威。父益。浙江按察使。聞先生傳伊洛之學。遣鎮來學。中乙科。官至膠州知州。

霍人撤淫祠者數家。○服先生之教。舉行家禮。

永樂十有四年丙申。先生年四十一歲。卦曲沃及垣曲。

省墓

還澠池省親。○先生至家。言語謙和。禮貌恭肅。出入不騎乘。溫溫恂恂。未嘗以賢知先人。鄉黨媿戚相謂曰。異常人遠矣。

高文質速化。○霍州鄉貢生文昌之兄也。與同輩觀樂中途返曰。此行曹先生得無知乎。如知何面目相見。縱不知終當自愧。不往。歸謂人曰。觀曹先生書籍。聽曹先生說話。饑可以忘食。寒可以忘衣。可輕其身。從流俗乎。

永樂十有五年丁酉。先生年四十二歲。山西請爲執事。誠子孫安分。○先生嘗謂子孫曰。人之處世。貴乎守己安分。夫安則無人欲陷溺之危。守則無亡身敗家之失。卽此便不貧窮。卽此便是富貴。不可奸狡取便益也。因作詩以諭之云。越奸越狡越貧窮。奸狡原來天不容。富貴若從奸狡得。世閒癡漢吸西風。

孫鐸生○如玉子

霍州門人劉勝等中鄉舉五人

永樂十有六年戊戌。先生年四十三歲。春正月。母邵氏

卒奔喪澗池既窆廬於墓所

二十有四日訃至被髮跣足號泣不輟明日遂行水漿不入口者三日途中苦塊水飲見者洒涕徒步抵家形容憔悴柴毀骨立柱而後起弔祭者哭迎哭送無少怠喪葬一如文公家禮不徇風水齋醮負土成邱樅栢成林靈雀巢於樹雉兔狎遊其閒鄉黨異之冬十有一月先生父亦卒○是月初十日也喪葬一如前倚廬墓所四方學者愈眾有司旌之先生辭曰人子當爲事非有加也第恐力行未至遺笑耳敢希名高乎

永樂十有七年己亥先生年四十四歲廬於墓所

新安游藝來學○字文博丁酉鄉貢士春闈不第就墓次而稟學焉

闕邢端修五嶽廟○大使邢端重修五嶽廟成請先生撰告文先生辭而闕之大畧言天子祭天地及天下名山大川諸侯祭境內山川大夫祭五祀士庶人祭其祖先此定分也所謂五嶽諸侯亦不得合祭東嶽泰山在魯封內惟魯侯得以祭之西嶽華山在秦

封內惟秦伯得以祭之。南嶽衡山在楚封內。惟楚子  
得以祭之。北嶽恒山在齊封內。惟齊侯得以祭之。中  
嶽嵩山在鄭封內。惟鄭伯得以祭之。今官不至侯伯  
職不比子男。乃合五嶽兼祭之。僭分越禮。莫此爲甚。  
言最激切。端慚謝。

永樂十有八年庚子。先生年四十五歲。廬於墓所。

霍州諸生詣闕疏請先生復任。○先生制未闕。諸生  
思其德。故有此請。吏部以制未終。不報。朝廷由是知  
名。

友人設齋醮。請先生祖先姓名奉之。先生隱其姓名  
不赴。○澠池有仕而居家者。命羽流設醮。僧流設齋。  
請先生三代名字供奉。亦敬賢之誠意也。先生答以  
偶忘其名字爾。再三請求。終不赴。異日其人猶不樂。  
先生曰。佛本無設齋之說。梁武帝始啟之。其後餓死  
臺城。老氏本無設醮之說。宋徽宗始啟之。其後困死  
金虜。欲求冥福。乃得實禍。覆轍可鑒也。其人又不然。  
先生曰。渠假棒頭之威。取不義之財。不能修省。諂求  
鬼神。己不循禮。而又誣他人。吾家自上世以來。皆尙

清白安貧賤。是以不赴也。其人大慙。後語人曰。曹公之言是也。吾終自惶恐。

戴振來學。○字文舉。澠岸生。稟學墓次中。是年鄉舉。官懷仁縣尹。今入鄉賢。

永樂十有九年辛丑。先生年四十六歲。廬於墓所。

三月服闋。夏赴河南府。折郡吏不信鬼神之間。○先生至府。郡吏素聞先生名。未識其面。聚觀之。問曰。舉世崇信鬼神。先生獨不事何也。先生曰。且如府太守清廉。列郡畏服。有人執金帛導以金鼓。欲賂太守。免

差稅如何。群吏愕然曰。如此將討死。先生曰。今人詭求鬼神。使神而果神耶。亦將討死。使非其人。安用事爲。設一人犯盜。一人殺人。上司追求至緊。二人各挾珍寶。暮夜請求免罪。太守可受而放之乎。今人不務爲善。臣不忠。子不孝。弟不遜。婦不順。積惡有罪。天理不容。乃諂媚鬼神。倖求非望。在鄉廣建淫祠。惑誘鄉人。在家裝圖神像。朝夕奉獻。苟無災禍。曰事神所致也。苟或不免。曰所事不恭也。惟知倚於鬼神而修身爲善。初不服計。神本正直。安受人間枉法乎。郡吏嘆

服不已。

秋赴京師

先生內外艱既除赴吏部試以包茅三傑諸葛孔明有儒者氣象等題甚嘉獎之出示同事者爲矜式

永樂二十年壬寅先生年四十七歲

春補蒲州儒學學正○司訓周先生曰曹正夫有道君子也○學博行高有古人風○其接引後學卽胡安定亦不過此

誕辰不受賀○先生嘗曰夫生日者父憂母苦之日也○人子親在則當設酒殺拜父母○親歿宜倍恭祠堂○終日哀慕○子在親歿安忍召賓客作樂乎○唐太宗生日不受章奏○况其下者哉

修治學垣不避太歲○時蒲學垣傾圮先生命工修築○門人某曰太歲在東未可修理○先生曰東家之西乃西家之東○太歲何在○爾欲避之乎○夫太歲天上歲星也○豈人間家家戶戶皆有一太歲耶○命亟修之○修理公廨不避土旺

先生修理公廨有言土旺者○先生曰土旺不用反用

衰土乎。且土旺不動土。水日不飲水乎。火日不吹火乎。金日不煉金乎。木日不折薪乎。五行在天地間。木旺于春七十二日。火旺於夏七十二日。金旺於秋七十二日。水旺於冬七十二日。惟土無專氣。無定位。故四季之末各旺一十八日。四季總得七十二日。是五行各旺七十二日而成一歲功也。五行一理而已。土旺猶金木水火之旺也。今於金木水火之旺皆不畏。避獨於土旺深避之。何惑之甚也。聞者嘆服。

同僚友劉周二先生避暑僧舍論坐次。○時送門人張翼喪暑氣方熾。過僧舍避之。謝琚背佛像設座。先生曰。只東西列坐。二先生問其故。先生曰。昔程伊川遊僧舍。二後生置座背佛像設之。亦如謝生也。伊川令列座。門人問曰。先生平日闢佛老。今何敬也。伊川曰。平日所闢者道也。今日所敬者人也。且佛亦人耳。想在當時亦賢於眾人者。故闢其道而敬其人。二先生嘆服。

謝琚尊教闢邪。○琚字德潤。先生高弟。琚在齟齬時。家有淫祀神像及佛老書。亦嘗尊信之。弱冠先生典

教蒲庠。一見悅之。與語斯道。始知淫祠像宜毀。佛老書宜棄。悉取其像與書火之。惟先生之教是尊。是信。先生嘗以勇於從善。見義敢爲稱之。

馮祥從化。○祥字文楨。蒲人。聞先生明正道。距邪說。毀淫祠。行家禮。以身爲教。奮然從之。踐履篤行。惟恐不及。

哀張縉喪。○先生蒞任數日。門人張縉卒。乃率諸生弔再拜。同列曰。過禮也。先生曰。師生原有答拜之禮。何過之有。

謁二賢祠。○二賢。伯夷。叔齊也。蒲州二賢鄉。首陽山在焉。上有祠墓。先生過而謁之。有詩曰。夷齊氣完天地塞。夷齊性全天地帥。真箇富貴不能淫。真箇威武不能折。遜國逃兮諫伐餓。千古孰能比清節。首陽埋骨化塵埃。宇宙聲光照日月。兩邱土近三千年。猶自森森列眞柏。柏兮柏兮參天清。歲寒幾度經霜雪。還有一子在時心。肯隨桃李媚春色。首陽山下知德多。世世烝嘗永不絕。

鄉貢士衡政史彬楊珪張福來學



蒲人撤淫祀者數家

永樂二十有一年癸卯先生年四十八歲

樊先生揖梓潼先生正言誨之○先生閒遊萬泉偕樊先生行過梓潼祠樊先生肅揖先生曰何諂也樊先生曰斯文宗主不可不敬先生曰梓潼主斯文孔子主何事

諸生有繼母訟其不孝者以道諭之○諸生有繼母誣其不孝告之先生鳴鼓召諸生曰爾有母不能善事豈非過歟生以繼母不慈誣訟爲對先生曰天下無不是的父母王祥臥冰伯奇履霜閔損單衣薛包洒掃事繼母也以繼母而不肯敬事視爾父爲何人愛親者不敢惡於人敬親者不敢慢於人况繼母乎吾早失怙恃不得終身奉養追慕何能及因流涕不已諸生感激垂淚不能仰視由是母子悔過而歸

營史璘葬事○璘門人中號穎悟者先生爲主其喪以儒禮葬之挽辭深以斯文不幸爲惜

諸生有欲作佛事葬親者以道正之○諸生有親死欲作佛事先生責之曰僧死不用道道死不用僧儒

家讀周孔書死而用釋老之薦豈非惑歟生日超度  
父母人子悲切之至情先生曰親死而禱浮屠是不  
以親爲君子而爲積惡有罪之小人也何待其親之  
不厚哉借使親實積惡有罪豈賂浮屠所能免生日  
舉世皆然不信佛事則以爲不慈不孝恐致鄉人非  
謗先生曰一鄉溺於流俗是不讀書的人子讀儒書  
明儒禮不以違禮爲非而以違俗爲非可謂執德信  
道之士乎一鄉皆然子能特立獨行卓然不爲流俗  
所染舉行周孔之禮則鄉人孰不轉謗爲譽而矜式  
哉因命子如玉與王惠相之一依文公家禮境內士  
大夫聞風相率觀禮約曰喪葬以禮祭祀以時毋爲  
曹氏之罪人得罪曹先生則得罪聖賢矣各當自勉  
主僚友喪○時訓導周敏河南新野人在京師其妻  
適卒先生爲主其喪二子欲用浮屠先生曰彼圖衣  
食竄亂天理果何益於死者乎其以禮葬之母惑其  
妾不肯服衰先生責以大義逼服之周歸大悅曰篤  
朋友之義嚴妻妾之分斥釋老之教一舉而三善備  
焉

年譜  
復謁二賢祠

霍州門人高或等中鄉舉四人

蒲州門人謝琚等中鄉舉十人

永樂二十有二年甲辰先生年四十九歲

白水劉贊來學○字德秀鄉貢士也○會試不第聞先生之風而來學

西安知府郭晟問政先生以公廉告之○晟字巨成霍州高弟擢西安府同知過蒲而問政先生答曰其公廉乎○古人云吏不畏吾嚴而畏吾廉民不服吾能而服吾公○公則民不敢慢廉則民不敢欺郭公佩其言○歷九載以公廉稱後兵部尙書王公某薦爲西安知府

醫療王鑑母○太學生王鑑母李氏夏四月患癰疽家貧不能醫先生爲之請醫士楊深診視月餘其疾愈鑑曰不惟活我母於瀕危之際卽今日膺貢於京得以齒備造列譽髦皆其惠也

門人有欲從淫祀者先生以大義責之○諸生某其母詣解州壽亭侯社請隨行先生鳴鼓召諸生日妄

行淫祀。詔求鬼神。非吾徒也。生日。母心欲之。先生曰。汝平日但少論父母以道之義。爾汝母離閨門。從淫祀。當明大義以死諫之。既不能諫。又從而助之。可謂孝乎。孔子曰。父有諍子。則身不陷於不義。生日。時關陝江浙千里赴會。何獨愚生。先生曰。彼無知之人。不知禮而妄行者。汝業儒有年。詎可混同流俗乎。且關雲長剛明正直。無少私曲。生爲侯王死爲明神。安肯饗民間婦女褻瀆哉。不然是貪饗飲食之鬼。非所以爲關王也。且雲長有功於蜀。蜀人祀之宜也。天下祀之非宜也。荆州祀之宜也。他郡祀之非宜也。解州祀之宜也。蒲州祀之非宜也。守土祀之宜也。民間祀之非宜也。

聖朝祀典。古今忠臣烈士。春秋祭祀。各有名分。府得祭者。州不敢與。州得祭者。縣不敢與。况民間乎。况婦女乎。於古則違禮。於今則違法。而以阿意曲從。越禮犯分。爲事可謂讀書學禮人乎。禮曰。婦人無故不出閨門。又曰。婦人不下堂。送客。又曰。婦人既嫁。不百里奔喪。今汝母不然。出閨門矣。下堂矣。出百里矣。猶不當

諍謂之孝可乎其人愧謝不往

冬報政因還澠池省先塋改葬弟昱○先是昱卒家人拘於禁忌葬不備禮先生爲改葬之素服九日不飲酒食肉○凡考妣忌日終日哀慕未嘗飲食言笑接見賓客倍恭祠堂而已○凡九族之喪先生聞訃必依制行之素服素食未嘗少閒

洪熙元年乙巳先生年五十歲春先生考績吏部霍蒲二州學者上章爭留之復補霍州儒學學正

時霍蒲諸生謀曰胡安定教授蘇湖人才濟濟咸稱師道得人今月川先生興賢育才傳道受業賢於蘇湖遠甚豈可失之各走詣

關上章求先生時以霍奏先至遂補霍州

謁司馬文正公祠

河間趙本來學○本字致用寧津人登乙科進士拙巢成○先生所築臺屋以拙巢名志謙也薛文清公官大理少卿時爲之記曰自七情熾而混沌鑿人之橫本競鶩者非私智無所爲尙由是巧僞日滋而斯道日隱矣濂溪周元公挺生南服悼末流之若茲

一刮羣巧作拙賦以見意。當時豪傑若程若張相與  
翕然尊尚之。而斯道大明。嗚呼盛哉。廣文曹均正夫  
世家河南之澠池。自少讀書。卽有求道之志。遂由關  
洛以上遡濂溪。因以拙巢名其讀書之室。蓋取元公  
賦意以自勉也。其後均名薦書典郡鐸。所至必以  
扁其寓室。以示不忘其初之志。今年秋均自蒲庠來  
河津。因語以名巢之意。且屬余記。余謂頽乎順處不  
撓其初。不汨其和。使大本完而七情節。此眾所謂迂  
僻遲鈍而拙於事者也。抑不知順事厥天。不以小智

害之。而可爲終身之安宅也。舞智寵物。騁詐軋人。機  
變層出。莫測端倪。此眾所謂辨敏儇捷而工於計者  
也。然詐窮智屈。自嬰其弊。豈可一朝安其身哉。今曹  
均慕元公之學。而以拙名巢。其可謂能擇所處而知  
所戒矣。則其進道之心。又何窮極哉。雖然。余亦拙者  
徒也。他日儻獲登均之巢。尙當闢混沌以廣均之居  
室。疏七情以通均之戶牖。與均舉酒而誦元公之賦。  
已而忘言相對。身巢兩忘。復不知巧拙爲何物也。是  
爲記。他日又題拙巢詩曰。經營渾不擾靈虛。獨占瀟

然太古居四面好風吹戶牖。滿天明月靜琴書。心閑  
斗室渠渠大。望遠雲山點點疎。不是元公當日賦。可  
能相與化爲徒。案先生三歲父命曰端。文清記改名  
均。意先生別有均名。耶抑門人避諱  
而改耶。姑  
闕以俟考。

宣德元年丙午先生年五十一歲四書詳說成

凡三十六卷永樂初註解已成今序之其畧云永樂  
中端正霍學爲諸生說四書一尊朱子成說先舉一  
章大旨而後分經以布其註衍義以詳其說然其間

朱子以爲易曉而不盡釋者初學之士或難之端用  
父師先正成說之精當者補之將以盡詳約而便初  
學焉時秦解元輩遂好錄而傳誦之暨端終制起調  
蒲州學蒲中士大夫又已傳之矣端見而驚且懼竊  
欲放許魯齊先生故事收而火之不可得矣乃取一  
二冊校之脫誤不勝枚舉至洪熙改元霍州

奏保復任得諸生所藏之說比之外傳差少脫誤遂從  
而正之越月方畢夫四書者孔曾思孟之書所以發  
六經之精義明千聖之心法也語其要分之則論語  
曰仁大學曰敬中庸曰誠孟子曰仁義合之則帝王

精一執中之旨而已矣蓋載道之器亦聖心之糟粕也始則靠之以尋道終當棄之以尋真不可徒誦說焉

典試陝西○得儁許璞等三十人○先生初至與同列語曰取士要在公平譬如蓋屋用一朽木必棄一良材間有以書干謁者先生辭以詩曰天道原來秉至公受天明命列人中掄才若不依天道王法雖容天不容其人慚愧至是無復以書干之者

試院與同列論太極○先生在試院有同列言先有無極而後有太極者先生曰只此一句便見所見之差流於老莊之說如此則於不相離之言實不相蒙與老子道生一而後生二莊子道在太極之先之說同歸於謬豈周子之意哉夫周子所謂無極而太極無謂無形象無聲氣無方所極謂至極理之別名也太者大無以加之者入地間凡有形象聲氣方所者皆不甚大如此極者雖無聲氣而有形象方所焉惟理則無形象之可見無聲氣之可聞無方所之可指而實充塞天地貫徹古今大孰加焉故周子言無極



年譜  
而太極是言無極之中而有至極之理朱子曰上天  
之載無聲無臭而實爲造化之樞紐品彙之根柢也  
同列見其發明詳盡豁然有悟

赴澠池省先塋○校藝而迴

蒲州門人荆恭等中鄉舉二人

宣德二年丁未先生年五十二歲

通書述解成○門人請解之既成四方學者爭先傳  
誦其篇中論孔顏之樂有云周子每令程子尋仲尼  
顏子樂處所樂何事欲學者深思而實體之不可但

以言語解會而已今端竊謂孔顏之樂者仁也非是  
樂這仁仁中自有其樂耳且孔子安仁而樂在其中  
顏子不違仁而不改其樂安仁者天然自有之仁而  
樂在其中者天然自有之樂也不違仁者守之之仁  
而不改其樂者守之之樂也語曰仁者不憂不憂非  
樂而何周程朱子不直說破欲學者自得之

大原彭延年考城樊希文來學○延年父彭宗古先  
生師也延年中癸卯鄉試至是承父命而來希文父  
官山西參政遣子來學

冬十月朔鄉飲與鄉老解明倫之義○眾賓請曰天下學校皆勝明倫敢請其義先生曰明倫者申明五常之道以教人也人倫有五君臣有義父子有親夫婦有別長幼有序朋友有信是也孟子曰人倫明上小民親於下蓋誦此耳師以是教弟子以是學止讀書作文取功名乎明日取文公小學明倫事語大書東西壁閒俾有所觀感而興起云復撰明倫堂記勝於上

子璠生○十有一月亥時也字美玉方數歲隨先生宴州大夫賜果有告以地下包者對曰如何有地下只天下地上滿座驚異因號爲地上童子

撰童子箴○先生因人以地上童子稱其子作箴勉之曰敦威儀慎行止正心術保身體孝父母友兄弟睦宗族和鄉里遠小人親君子事誠明一終始不他求得於此

宣德三年戊申先生年五十三歲

春三月太極圖述解成

其序畧云太極者象數未形其理已具之稱形器已

具而其理無朕之目。是生兩儀則太極固太極兩儀生四象則兩儀爲太極四象生八卦則四象爲太極推而至於六十四卦生之者皆太極焉。蓋孔子而後論太極者皆以氣言。老子道生一而後乃生二。莊子師之曰道在太極之先。曰一曰太極皆指作天地人三者形氣已具而混沌未判之名。道爲一之母在太極之先而不知道卽太極。太極卽道以通行而言則曰道以極致而言則曰極。以不雜而言則曰一。夫豈有二耶。列子混沌之云。漢志含三爲一之說。所指皆

同。微周子啟千載不傳之秘。則孰知太極之爲理。非氣也哉。且理語不能顯。默不能藏。固非圖之可形。說之可狀。只心會之何如耳。二程得周子之圖之說。而終身不以示人。非秘之無可傳之人也。是後有增周說首句曰自無極而爲太極。則亦老莊之流。有謂太極上不當加無極二字者。則又不知周子理不離乎陰陽。不雜乎陰陽之旨矣。亦惟朱子克究厥旨。遂尊以爲經而註解之。直至當歸一之說也。至於語錄或出講究未定之前。或出應答倉卒之際。百得之中。

不無一失。非朱子之成說也。近世儒者多不之講。聞有講焉。非舍朱說而用他說。則信語錄而疑註解。所謂棄良玉而取頑石。掇碎鐵而擲成器。良可惜也。端弱冠業儒。漸脫流俗。放異端。自強而後。因故所學而潛心玩理。竊患爲成書病。如前所云者。乃於講授之餘。大書周說。而分布朱解。倘朱解之中有未易曉者。輒以所聞釋之。名曰述解。後附以氣化形化死生輪迴辨戾詩讚文。以俟夫同志。

氣化詩○太一分兮作兩儀。陰陽變化化工施。生人生物都無種。此是乾坤氣化時。

形化詩○乾坤氣化旣成形。男女雌雄牝牡名。自是生生有形化。其中氣化自流行。

死生詩○陰陽二氣聚時生。到底陰陽散時死。生死陰陽聚散爲。古今造化止如此。

輪迴詩○空家不解死生由。妄說輪迴亂大猷。不有天民先覺老。孰開我後繼前修。

太極圖說讚○濂溪夫子卓乎先覺。上承洙泗。下開河洛。建圖立說。理明辭約。示我廣居。抽關啟鑰。有條

有要有本有末。斂歸一心。放彌六合。月白風清。鳶飛魚躍。舜禹得之。崇高卑若。孔顏得之。困極而樂。舍此而爲異端俗學。造端之初。胡不思度。毫釐之差。千里之錯。

太極辨戾文畧云。先賢之解太極圖說。固將以發明周子之微辭。用釋後生之疑惑。然而有人各一說者。焉有一人之說。而自相齟齬者焉。且周子謂太極動而生陽。靜而生陰。則陰陽之理由乎太極之動靜。而朱子之解極明備矣。其曰有太極則一動一靜。而兩

儀分有陰陽。則一變一合。而五行具。尤不一異焉。又觀語錄。却謂太極不自會動靜。乘陰陽之動。靜而動靜。遂謂理之乘氣。猶人之乘馬。馬之一出一入。而人亦與之一出一入。以喻氣之一動一靜。而理亦與之一動一靜。若然。則人爲死人。而不足爲萬物之靈。理爲死理。而不足爲萬物之原。理何足尚。而人何足貴哉。今有活人騎馬。則其出入行止疾徐。一由乎人。馭之何如。爾活理亦然。不之察者。信此則疑彼矣。信彼則疑此矣。經年累歲。無所折衷。故爲辨戾。以告夫同志。

君子。

秋七月存疑錄成。○序云存疑錄錄先知先覺之微辭奧義而存之以釋疑焉而已矣。端自幼業農弱而學儒苦爲流俗異端所困。後數年方漸脫之。放之而至於一正之歸。然尙爲科舉之學縻之。自強以來。潛心理學。初若駕孤舟而泛烟海。渺茫瀰漫。瀕洞浩瀚。莫知涯涘。恍忽艱甚者久之。逮知命而後。方聞天下無性外之物。而性無不在焉。性卽理也。理之別名曰太極。曰太乙。曰至誠。曰至善。曰大德。曰大中。隨意取

名不同而道則一而已。六經四書之後。闡明開示。至當歸一之論。惟濂洛關建大儒。眞得孔孟宗旨。傳帝王之心法。發天地之精蘊。端竊尊之信之。而老拙於記。則日忘所能者多。而懼得罪於聖門焉。雖老且病。敢倦於勤。是以於講授之餘。信手錄其說之萬一首。太極以闡造化之源。次陰陽以明造化之法。而後列其入身以形。有涯有涘。或動或靜。在幽在明。之久之暫。之所以然。與其所當然之故。及夫道統之傳。異端之辨。以實造化之理之氣之無窮。則吾道一以貫之無

遺焉。故萬物之靈而曰人者，後天地生而知天地之始。先天地歿而知天地之終。然而在所錄者不能無重復，不在所錄者又豈無精要者？蓋無夫子刪述之筆焉。故爾尚冀有道而成人之美者爲之節文焉。自稱伊洛後學。○伊洛之閒二程生焉。先生晚年見道分明，自稱伊洛後學，真可謂兄兩程之教而弟之矣。

孫鑑生○如玉之子

宣德四年己酉先生年五十四歲

### 中牟單信來學

西銘述解成○因門人之請而成序畧云大意明理一而分殊。文公註之明且備焉。然學者或未得其說。端爲分經布註以解之。

秋八月復典試陝西○得僑惠溫等亦三十人。先生在試院既定高下。束其卷大書曰。至公無私。鬼神鑑察。藩臬大臣無不嘆服。同列王紹送別詩曰。妍媸盡在文衡下。賢否難逃藻鑑明。其爲當時推重如此。送別澹灞與門人論詩文○西安太守郭巨成暨謝琚

相從於漣灞之間。談詩馬上。郭曰。古人云。吟成五字句。用破一片心。琚曰。古人云。吟成五字。歸先生應曰。可惜一片心。用在五字上。蓋恐學者溺於詩文。不務義理。故發此須臾。曰。古人文人自是文人。詩人自是詩人。儒者自是儒者。今人欲兼之。是以不能工也。賢輩文無求奇。詩無求巧。以奇巧而爲詩。文則必穿鑿謬妄。而不得其實者多矣。不若平實簡淡。爲可尙也。

詣澠池省墓。○校藝而迴。

霍蒲門人中鄉舉共三人。○史濡張義霍人。王惠蒲人也。

宣德五年庚戌先生年五十五歲

秋七月建頌書閣成。○凡

聖朝所頒諸書珍藏閣上。其下書太極先天後天等圖。於四壁。而與四方來學者日講授於其中。至若化龍圖。則有說函三爲一。則有辨焉。

宗藩以識荆重先生。○晉定王道經霍州。獨留先生。喜曰。某今日幸得識荆。願聆微言。爾時先生疾。王以



己服藥贈之先生以詩謝王賡其韻焉

冬十二月儒家宗統譜成○其序畧曰儒家宗統譜是儒家之真源正派也蓋真源乃天地人之所自出正派乃皇帝王之所相承所以參天地而立人極者焉然其大目則曰三綱曰五常而其大要則曰一而已三皇儒而皇五帝儒而帝三王儒而王皐夔稷契伊傅周召儒而相孔子儒而師然則孔門一帝王之教耳帝王一天地之道耳儒家者所以相天地宗帝王師聖賢心公天下萬世之心也道公天下萬世之道也朱子謂釋氏出於自私之厭老子出於自私之巧夫彼豈可與此同年而語哉端固愚陋恍然於源之真派之正似有見焉於圖而譜之用以存疑然不敢自私將俾願爲儒家之精到者一覽知真源正派之所在則亦庶乎迷津之一指云耳

孫鏡生○廷玉之子

宣德六年辛亥先生年五十六歲

作月川圖詩因自號日月川子學者遂稱爲月川先生○先生得太極圖之精旨故爲川月交輝圖喻其

全言  
妙其圖天上一月川中九月蓋取月映川水之意爾  
其詩曰天月一輪映萬川萬川各有月團圓有時川  
竭爲平地依舊一輪月在天起句喻統體之太極承  
句喻各具之太極轉句喻萬感之俱寂合句喻一理  
之常存畫圖於頒書閣下日吟咏其間其洞徹斯道  
之妙如此

邠州趙新二子來學○新爲戶部侍郎遣子宗善宗  
吉來學

性理論成○山西藩府委先生同沈侍御校郡邑士  
半歲爲忘勢交凡經史疑難性理奧旨陰陽所以交  
代天地所以高深日月星辰所以照耀雷風雨露所  
以興作山川所以流峙草木所以生長問答至忘寢  
食侍御無不嘉納其於性理奧處必欲先生立論明  
之集成侍御題其首曰性理論

山西藩臬不以屬禮待○先生道德聞望素爲人所  
景仰時按察司張公政憲體雖肅而一見先生甚與  
之欵洽不拘以屬禮謂先生曰我編一賢人錄以先  
生居首因聯轡馬上贈以詩曰景仰聲光久相逢始

有因文章濂洛胄德行閔顏隣心地明如月襟懷蕩  
若春圖書探討處筆下豈無神旣歸欲薦先生未幾  
而歿

宣德七年壬子先生年五十七歲

夏六月孝經述解成○先生取唐元宗許魯齋二解  
述其精當者分經布註解之其未瑩者釋以己意名  
曰孝經述解序畧云性有五常而仁爲首仁兼萬善  
而孝爲先蓋仁者孝所由生而孝者仁所由行者也  
是故君子莫大乎盡性盡性莫大乎爲仁爲仁莫大  
乎行孝行孝之至則推無不準感無不通又曰孝云  
者至德要道之總名也經云者垂世立教之大典也  
然則孝經者其六經之精義奧旨歟

八月復典試陝西○得僑趙俊等復三十人

試院與同列論配饗○先生謂先聖廟曾點顏路伯  
魚皆父也坐於兩廡顏子曾子子思皆子也坐於殿  
庭同列曰以傳道言先生曰道何道也旣非老子之  
道又非佛氏之道儒家之道不過明人倫而已父坐  
廊廡之下子坐殿庭之上何在乎明人倫也此唐家

之謬歷代踵而行之耳同列曰然則宜何如先生曰  
合於殿庭之東另設一祠以孔子父叔梁紇居中以  
顏路曾點伯魚敘坐左右庶幾理當

先生據經答疑難○先生典試將歸西安太守顧公  
煨等送漉灞之間相從數十里與先生談論無不嘉  
納因舉孟子天時不如地利地利不如人和至環而  
攻之爲問先生答曰朱子集註環圍也言四面攻圍  
曠日持久必有值天時之善者此天時不如地利也  
趙岐古註環者筮而用之軍師之名也按周禮春官

筮九曰巫環筮音也以筮環知吉凶也環而攻之筮  
而行之也攻之則筮吉故曰必有得天時者矣得天  
時之吉則必勝可也雖得天時之吉而不能克之者  
非天時之吉不如地利之善乎又舉孟子言無實不  
解不解之實蔽賢者當之爲問先生答曰只將無實  
之實作賢字讀便通蓋世不絕聖國不絕賢故曰十  
室之邑必有忠信如孟子在齊淳於髡言無賢者也  
有則髡必識之本有言無以蔽之是不祥也故曰言  
無賢不祥蔽賢出於媚疾之私妨賢病國私意橫起

上不欲正其君下不欲福其民不祥之氣固已充溢於中矣且天生賢人以爲民也彼違天而蔽賢妨賢而病國不祥孰甚焉歸太守謂同列曰曹先生眞道學

赴澠池省墓

霍州門人米厥中鄉舉

孫欽生○廷玉之子

宣德八年癸丑先生年五十八歲

春三月辛巳夫人陳氏卒二十八日也享年五十有

二三葬霍城東南二里許高氏之原其子琇璟廬墓先生祭文畧曰惟嬪敬我祖宗孝我父母和我宗族慈我兒女於我一身豈曰小補

宣德九年甲寅先生年五十九歲

夏六月丁丑先生卒於霍○月朔之明日也先是州大夫入問疾曰諸大夫能寬一分則民受一分之賜吾無遺恨矣諸生入問疾曰賢輩尊所聞行所知吾無遺患矣已而召諸生語之曰吾平生不喜佛老不悅齋醮惡其害道亂正也我死爾曹當以我葬考妣

年譜  
之禮葬我母我污也諸子不勝歔歔先生正衣冠而  
承訣矣

庚寅葬霍城東○月之望日也先生葬陳夫人於此  
故就葬焉子琇璟廬於墓所

先生墓誌銘成○門人蒲坂謝琚誌先生墓畧云先  
生讀書自朝至夕○手不停披自暮達旦○心無外慕冬  
不爐夏不扇不飲酒不啜茶蓋其性然也○既壯傳通  
五經師聖友賢履德身道內不溺於章句文辭之習  
外不惑於異端邪說之謬卓然以斯道爲己任登永

樂戊子鄉試第二○明年試春官中乙榜第一○釋褐授  
霍州學正○始至詢郡中有學行者得李白雲同升講  
席久而愈敬○壬寅調蒲州學正○始至察境內有學行  
者獲王士希往來交遊久而彌親○二州諸生無不悅  
服其文風丕振化雨宏敷由先生而化者甚眾○四方  
學者聞風嚮慕○覲德心醉○西蜀山東陝西河南直隸  
太原相繼來學者又幾百人○鄒魯河洛之教復見於  
今日○師道得人先生一人而已○銘曰曹本楊姓繼舅  
氏後世有偉人以昌厥胄周流寰海跋涉經營始遷

垣曲繼轉永寧。直至澠池家業始定。篤生賢哲。斯文是任。心醉六經。博古通今。忠清和易。灑落誠明。居仁由義。立忠行孝。振鐸霍蒲。倡明斯道。著書立言。學有淵源。開來繼往。同歸聖賢。迺闢異端。迺距邪說。扶持風教。文人巨伯。迺典文衡。迺選俊英。掄校無私。正大公平。

聖代真儒。天明先覺。上承鄒魯。下續濂洛。年甫耳順。兩楹奠餘。嗚呼已矣。傳者誰歟。

謝琚曰。先生志淨人欲。心涵天理。克己復禮之言。未嘗忘於口。

先生修己教人。動合禮法。一言一行。皆有規矩。一動一靜。盡合準繩。

先生修己明善。誠身無所不至。未嘗不安舒自得也。手容恭。足容重。頭容直。氣容肅。此其爲人所欽也。

先生教人。講論精切。言言根諸性靈。心術未嘗以賢知先人。若夫不挾長。不挾貴。不挾故。尤人所難及者。先生自少喜談人善。惡稱人惡。有稱人善者。喜動顏色。問其顛末。記念不忘。樂善之誠也。見有稱人惡者。

則佯若不聞。或舉他言以沮之。終身不以語人。忠厚之至也。

先生接人溫和。不較短長。不計貨利。一以誠心與之。故賢者慕焉。愚者化焉。雖婦人女子。走卒樵夫。皆知稱先生名。而德先生德。其德化之感人深矣。

先生教授霍蒲。未嘗分毫倦怠。雖隆冬盛暑。不冠帶。不見諸生。有所叩問。輒據事理答之。雖夜必興。雖食必輟。其俯而就之如此。



先生之學。自格物致知。而推及於治平之大。自洒掃應對。而推及夫位育之至。窮理以盡性。明善以誠身。道學君子也。士大夫見其詩。則曰工於詩者也。見其文。則曰工於文者也。見其講論經書。則曰明於理性者也。見其著書立言。則曰志於道德者也。見其譚論人物。則曰考究精詳者也。見其闢邪攘異。則曰志意堅定者也。合六者而並觀之。則曰博學而無所成名者也。然則先生其一貫者乎。


先生平生。衣取蔽體。食取充口。目不觀非聖之書。口不談非聖之言。未嘗一日閒也。夜分乃寢。雞鳴而起。



諸子侍立左右。肅恭不怠。則是子孫化也。夫人高年。參謁必跪。則是室家化也。兄愛弟恭。和順親睦。則是兄弟化也。諸婦皆知禮義。饋獻整潔。無故不窺中門。出入必擁蔽其面。則是婦女化也。鈴下蒼頭。皆知廉恥。趨事赴工。不大聲色。則是僕隸化也。是故君子以至誠爲貴。至誠則無不化。此皆人所共見者。

先生足所履者。聖賢之跡。身所處者。聖賢之道。從容乎仁義之府。周旋乎禮法之場。循規而蹈矩。立忠而行孝。濂洛關閩之後。道學之傳。心法之微。先生一人而已。





110X  
331  
8